

1.2 Rapòrt resumí

Resúmen

Den su promé investigashon di medio ambiente, Kontraloria General a kontrolá si gobièrnu ta kreando e kondishonnan nesenario pa ehekushon di e maneho di medio ambiente i naturalesa. Komo kriterio pa evaluá esaki, a usa e prekondishonnan ku ministerio di Salubridat, Medio Ambiente i Naturalesa (SMAN) mes a establese al respekto den e nota di maneho di 2012 dirigí na e organisashon di ehekushon: Maneho di Medio Ambiente i Naturalesa (MMAN). E prekondishonnan ei tin di aber ku aspektonan di organisashon, formashon, personal, infrastruktura i ekipo di trabou, legishon i instrumento di maneho.

Último añanan, tabatin diferente esfuerso hasí pa mehorá e manera ku MMAN ta funshoná. Danki entre otro na e esfuersonan akí, a logra kumpli ku vários (parti) di e prekondishonnan akí:

Ku fondo di entre otro USONA, a hasi diferente invershon. Entre otro, tabatin kurso profeshonal i un training di integridat pa miembronan di personal, a formulá un kódigo di kondukta i deskribí e produktonan i proseso di trabou, ròl i funshon. Tambe, a kumpra un sistema outomatisá pa atministrá e petishonnan di pèmit i a formulá manual pa garantisá ku, en prinsipio, e prosesonan di trabou, inkluso e prosedimentu di imposishon di kumplimentu (handhavingsprocedure), ta ser ehekutá korektamente.

Ademas, a kumpra stashon pa midi polushon, Gemeentelijke Gezondheidsdienst Amsterdam a duna algun kolaboradó di MMAN formashon pa nan fungi komo administradó di stashon di midimentu i a prepará sierto miembro di personal pa por karga outoridat di Buitengewoon Agent van Politie.

Na 2014 a solushoná e falta di vehíkulo di trabou i a kumpra un aparato pa midi zonido. Ademas, ora MMAN tin mester di sierto ekipo, den sierto kaso e por optené esakinan for di tersero.

Pa medio di legislashon e posishon hurídiko di e kolaboradornan ta strukturalmente garantisá. Relativamente hopi empleado a kuminsá kaso den korte kontra gobièrnu debí ku nan ta malkontentu ku nan posishon hurídiko. Entrada na vigor di Landsverordening Bevordering Openbare Orde en Bescherming Gemeenschap LBOOBG (Ordenansa Nashonal Órden Públiko i Protekshon di Komunitat), dia 22 di yüli 2015, a yena un bashí hurídiko ku MMAN tabata konfrontá. A base di e ordenansa akí, awor MMAN por intervení den tur tipo di akto ku tin un efekto negativo riba medio ambiente, no únikaamente esunnan ku segun Ordenansa di Molèster por sosodé solamente ku un pèrmit.

Aki ta sigui un lista di e prekondishonnan ku no a kumpli kuné:

- No a formulá un plan di Formashon i Preparashon (FiP) ni presupuestá sufisiente fondo pa FiP.
- No tin sufisiente aparato pa midi zonido i no tin un instrumento pa midi polushon di aire na sitionan mes, ora entre otro skolnan hasi un keho tokante polushon.
- No tin alohamentu adekuá.
- No a tuma sufisiente medida den sentido di formulá prosedimentu pa garantisá integridat di e organisashon.
- No a nombra hefe di unidat pa kai bou di e hefe di MMAN.
- No tin sufisiente personal ku konosementu spesialisá di manera ku e pèrmitnan (revisá) di molèster pa e ramonan di industria mas kompleho por sali denter di e plaso ku lei ta preskribí i pa por imponé kumplimentu di e kondishonnan na un manera minusioso.

- No ta tur e empleadonan enkargá ku dunamentu di pèrmit i imposishon di kumplimentu pa e otro industria- i aktividatnan ku ta afektá medio ambiente ta funshonando debidamente. Ademas, en bista di nan aktitut, motivashon i nivel di preparashon (previo), no ta premirá ku e falta di prestashon akí ta algu ku por solushoná mediante mas training. Bou di gobièrnu su maneho aktual riba tereno di planifikashon di kontratashon di personal, ta pa e funshonnan di mas prioridat so tin mag di buska personal, i niun di e funshonnan en kuestion no ta funshon priorisá. Bou di direkshon di ministerio di Gobernashon, Planifikashon i Servisio (GPS), a formulá un proposishon di maneho komplementario a base di kua lo por transferí e empleadonan ku no ta funshonando debidamente i duna nan un funshon ku en bista di nan kualifikashon ta mas adekuá pa nan.
- No tin muchu klaridat tokante e kantidat di personal ku tin mester pa emishon di pèrmit i imposishon di kumplimentu pa loke ta trata e otro ramonan di industria i aktividatnan ku ta afektá medio ambiente. Esei ta debí ku no tin un bon bista di kuantu persona òf entidat lo mester tin pèrmit di molèster ni kon grave e diferente problemanan di medio ambiente ta.
- Tampoko no tin bista di kua ta e tareanan ku MMAN lo keda enkargá kuné i kua lo bai kai bou di Inspekshon di Medio Ambiente (ku ta parti di Inspekshon di Salubridat).
- Ainda no a bin ku un ordenansa nashonal di Desperdisio Sólido i Kímiko. Komo resultado, no tin regla tokante kon mester deshasí di sushi di kas, sushi grandi ('gròf') di kas, sushi di negoshi i resto di outo.
- Pa finalisá, ainda no tin norma fihá den lei tokante kalidat di aire, suela i awa, ni no por traha Rapòrt di Efekto Riba Medio Ambiente (Milieu Effect Rapportage) pasobra no tin un ordenansa nashonal tokante Base di Maneho di Medio Ambiente.

Konklushon

Kontraloria ta yega na e konklushon ku, debí na e echo ku e (partinan prinsipal di e) prekondishonnan pa por ehekutá e maneho di medio ambiente no a bira realidat (esta, sufisiente konosementu spesialisá pa atendé e ramonan mas kompleho di industria i un nivel di prestashon adekuá di e personal ku tin ku

atendé e otro ramo- i aktividatnan), Ministerio di Medio Ambiente i Maneho di Naturalesa lo no por ta masha ambisioso den ehekushon di su labornan. Introdukshon di LBOOG ta duna MMAN un base hurídiko pa intervení awor kontra tur sorto di akto ku ta afektá medio ambiente. Pero debí na falta di personal kompetente, aplikashon efektivu di e lei akí lo keda limitá.

Tanten ku no kumpli ku e prekondishonnan menshoná, e esfuerso- i invershonnan hasí lo no kontribuí na un mihó ehekushon di e maneho di medio ambiente.

Ta bin aserka ku, tanten ku no tin un bista di kuantu persona òf entidat na Kòrsou lo mester tin pèrmit di molèster ni kon grave e diferente problemanan di medio ambiente ta, no ta eksistí un base pa por kuantifiká ophetivo di medio ambiente ni pa fiha na un manera realístiko kiko bo ke logra ku e maneho di medio ambiente.

Rekomendashon

En bista di e konklushonnan, e rekomendashonnan ku Kontraloria ta hasi aki tin di aber spesífikamente ku e kondishonnan esensial ya menshoná. Kontraloria ta rekomendá minister pa:

- Duna su aporte pa Konseho di Minister (KdM) fiha e proyekto di ordenansa nashonal di Desperdisio Sólido i Kímiko i presentá esaki na Konseho di Konsulta (Raad van Advies) mas pronto posibel, pa Parlamento por aprob'é.
- Sòru pa su ministerio formulá mas pronto posibel un proyekto di ordenansa nashonal tokante Base di Maneho di Medio Ambiente, pa e proseso di atend'é i aprob'é por kuminsá kana. Pa logra esei, Kontraloria ta proponé pa minister formulá un plan di proyekto partí den etapa.
- Laga inventarisá e konsekuensianan pa situashon di medio ambiente i tambe di salubridat públiko riba término kòrtiku i largu, si no empleá perisia esensial pa maneho di medio ambiente. Si gobièrnu no tuma suficiente medida kontra kontaminashon di medio ambiente, ku tempu esei lo tin konsekuensia pa salú di pueblo i pues tambe pa e gastunan di gobièrnu relashoná ku salubridat públiko i imposishon di kumplimentu. Saniamentu di dañu na medio ambiente den área públiko ta kore pa

kuenta di gobièrnu. A base di e resultadonan di e investigashon, por resultá ku mester (re)evaluá prioridat di sierto funshon.

- Logra pa tur e partidonan enbolbí, i na promé lugá Konseho di Minister, fiha e proposishon di maneho komplementario mas pronto posibel, pa e empleadonan ku no ta adekuá pa nan funshon aktual por pasa pa kumpli ku otro funshon ku sí ta mas adekuá en bista di nan kualifikashon. Pa e trayekto por transkurí ku éksito, Kontraloria ta rekomendá minister pa for di awor, en espera di fihamentu di e maneho komplementario, kuminsá inventarisá kua ta e empleadonan di su ministerio ku ta bini na remarke pa e trayekto akí, i pa ki motibu. Ademas, ta proponé na minister pa buska personal adekuá pa e kuponan di trabou ku lo bira liber.
- Laga hasi un inventarisashon di kuantu persona òf entidat na Kòrsou lo mester tin pèrmit di molèster i inventarisá gravedat di e diferente problemanan di medio ambiente kousá pa kada grupo di persona i entidat ku mester tin un pèrmit di molèster. Podisé e resúmen ku tin den e Rapòrt Final di Norma di Medio Ambiente di 11 di yüni 2007 por sirbi komo ehèmpel pa esei.